

四庫全書

集部

欽定四庫全書

集部

後村集卷七

八

詳校官庶吉士臣吳烜

主事臣呂雲棟覆勘

總校官進士臣朱鈴

校對官主事臣陳文樞

謄錄監生臣金拱闇

欽定四庫全書

後村集卷七

宋 劉克莊 撰

詩

蔡忠惠家觀墨蹟

維蔡郡之望過者必式廬嚴嚴端明廳遺像猶肅如頗
聞手澤富倘許窺珍儲主人命發笥渠兒同卷舒比顏
倍秀麗眠柳加敷腴毫抗兩記在妙與蠟本殊洛橋字
尤佳其大徑尺餘班班名臣帖煌煌昭陵書坐令承學

士若覩慶歷初向來故家物聚散何忽諸祭器抱他適
玉軸棄路隅端明夢奠時應爾唯一孤厥裔日以蕃廟
院蜂房居寸紙惜如命不博明月珠乃知儒澤遠浮榮
無根株勗哉守視者巾襲防蠹魚

昔方孚若主管雲臺予監衡岳每歲瑞慶節常
聚廣化寺拈香癸未此日獨至寺中輒題一絕

同作祠官荷聖朝年年相待放生橋精廬此日來無伴
稽首爐熏自祝堯

有感

策策秋聲起樹枝
遙憐塞下雁來時
寧聞中夜荒雞舞
肯拾他人竹馬騎
短劍舊曾交俠客
小詩猶足將偏師
無情却是青銅鏡
剛照書生兩鬢絲

輓水心先生二首

一夢孝皇初悽然
四紀餘國人莫知
我天下孰宗余散
地雖無柄名山儘
有書嗚呼傳萬世
猶足矯玄虛

所學如山海吁嗟
不一施未聞訪箕
子但見誅宣尼空

郡來陪哭無人敢撰碑紛紛門弟子若個解稱師

林容州別墅

出郭五里強治地十畝寬奇峯面朝挹高阜背屈蟠忽
獻若神授久闕由天慳茲焉卜壽宮朱堊浮林端使君
世慮澹出嶺顏如丹靜思三窟危孰如一丘安時松既
森秀引泉亦甘寒願言奉巾屨暇日來盤桓

哭林山人

僵卧茅簷下怡然八十春竟無衾覆首唯有錦隨身賻

弔稀來客封崇託外親自言墳出貴後必產奇人

輓方孚若寺丞二首

使君神雋似龍麟行地飛空不可馴詩裏得朋卿與我
酒邊爭霸世無人寶釵去盡中年病珠履來疎晚節貧
昔共誅茅聽瀑處溪雲谷月亦悲辛

斯人詎意掩斯丘六合茫茫不可求射虎山中如昨日
騎鯨海上忽千秋帝方欲老長沙傳世尚能言博望侯
回首瀨溪溪畔路跛驢無復從公遊

輓方武成二首

左鉞

頗有翁標致唐衣折角巾雖疑頭小銳極愛腹精神闊
矣雲霄志悲哉露電身世間無妙質一痛惜斯人

卅角詩名出流傳海內誇師稱起予者翁問倩人邪惜
未參諸老猶堪擅一家從今崖瀑上誰共訪梅花

福州道山亭

南豐
作記

絕頂烟開霽色新萬家臺觀密如鱗城中楚楚銀袍子
來讀曾碑有幾人

建州

風緊雲高雪尚慳
建州城北倚欄干
林梢淡日紅如綫
應為梅花煖晚寒

起來

起來呵手檢衣篝
燭影蛩聲伴小樓
賴有夢中堪細說
錦牋寫不盡離愁

入浙

浦城南畔只輕陰
入浙方驚雪許深
梅鴈楓丹三百里

笑人短幅寫寒林

寄人

老攜詩卷入京華
覓店先須近酒家
白髮但能妨進取
未妨痛飲插梅花

壽昌

山路泥深雪未乾
病身初怕浙西寒
新年臺歷無人寄
且就邨翁壁上看

桐廬

桐廬道上雪花飛一客騎驢覓雪詩亦有扁舟蓑笠興
行吟却怕子陵知

富陽

便著羊裘也不難山林未有一枝安富春耕種桐江釣
却羨先生別墅寬

記夢

父兄誨我髭髥初老不成名鬢髮疎紙帳鐵檠風雪夜
夢中猶誦小時書

出都

客子來時臘雪飛
出城忽已試單衣
湖邊移店非無意
要共林逋話別歸

題硯

吾硯平生極自珍
塗雲抹月發清新
臨歸攜就西湖洗
不受東華一點塵

杜丞

憶冒重圍入孤城
賴不亡戰功何日賞
檄草至今藏舊

事歸詩卷新寒入箭創江邊聞杜杲髮髻各蒼蒼

久客

久客長安市人情薄似雲寧為絕交論不著送窮文
白髮長千丈黃金盡百斤故山春事動深恐廢耕耘

贈陳起

陳侯生長紛華地却以芸香自沐薰鍊句豈非林處士
嚮書莫是穆參軍雨簷兀坐忘春去雪案清談至夜分
何日我閒君閉肆扁舟同泛北山雲

贈翁卷

非止擅唐風尤於選體工有時千載事祇在一聯中世
自輕前輩天猶活此翁江湖不相見纔見又西東

路傍桃樹

為愛橋邊半樹斜解衣貰酒隔橋家唐人苦死無標致
只識玄都觀裏花

題壁

兒時挾彈長安市不信人間果有愁行遍江南江北路

始知愁會白人頭

馬上口占

陌上鞦韆索漸收
金鞭懶逐少年遊
晚風細落梅花點
飛上春衫總是愁

輓李尚書二首

韓范止如此公乎
事又艱不陪治城廟
合殉定軍山壘
出千官賀弓藏一老閒
琬戈提十萬猶記凱歌還

幕下多材雋於今
盡策勲可憐狂處士
曾揖大將軍久

成兒郎老新招部曲分此生甘寂寞有淚濕高墳

橋西

昔飲橋西歲月多梨花深處侍郎過垂鞭欲訪前裙約
奈此蕭蕭鬢雪何

黃田人家別墅繚山種海棠為賦二絕

萬紅扶路笑相迎彷彿前身石曼卿若向花中論富貴
芙蓉城劣海棠城

海棠妙處有誰知全在胭脂乍染時試問玉環堪比否

玉環猶自覺離披

郭熙山水障子

高為峯嵐下濤江極目森秀涵滄浪始知著色未造極
一似醜女施鉛黃驚泉駭石聚幽怪巨楠穹柏蟠老蒼
鹿門寺華子岡是耶非耶遠莫詳疑聞鐘聲起晡靄似
有帆影來微茫陌窮渡絕雪滿坂驢鞍釣笠分毫芒炎
曦亭午試展玩坐覺烟雨生縑緗古來絕藝必名士俗
史辟易安敢當大年脂粉米老狂先朝僅數燕侍郎吾

聞河陽子貴購父畫一筆不許他人藏矮屏短岫已可
寶況此四幅垂華堂嗚呼主人謹護守神雷鬼電或取
將

輓林夫人

方孚
若母

奉使年三十聲名滿四夷奇哉何物媪生此丈夫兒墓
竟同孫寔家猶有婦持向來稱壽地忍聽鼓琴悲

輓葉夫人

丞相女孫
孚若內子

年與藁砧齊來嬪自始筭典刑丞相子禮法大夫妻怪

鵬驚頻集離鷺忍隻棲傷心衾含等猶是嫁時齋

題洪使君詩卷

陳師復為序

刻于芹泮士爭披傳到茅廬我切窺突過韋郎森戟句
高如柳惲采蘋詩日唯坐嘯薰沉水間亦揮毫品荔支
况有太丘為小序遙知流布滿京師

闕全驟雨圖

四山昏昏如潑墨行人對面不相覲淒乎太陰布肅殺
闐然混沌未開闢千丈擎空蟄龍起一聲破柱春雷疾

我疑人間瓠子決或是天上銀河溢異哉烟霏變態中
山川墟市明歷歷茅寮竹寺互掩映疎舂殘磬渺愁寂
叟提魚出寒裂面童叱牛歸泥沒膝羊腸峻坂去天尺
驢餓僕瘦行安適林僧卸笠窘迴步海商拋碇憂形色
縱覽鯢鵬信奇偉戲看鳬雁亦蕭瑟乃知畫妙與天通
模寫萬殊由寸筆大而海嶽既盡包細如針粟皆可識
向來關生何似人想見丘壑橫胸臆嗚呼使移此手為
文章豈不擅場稱巨擘

哭左次魏二首

墓

少日一編書中年丈二父乃知杜預智誰謂狄山愚小
試飛箝策方為進築圖到頭麟閣上終不著臞儒

甫痛何郎天丘明亦復然因思題墓上不若鬪樽前劍
馬為誰得琴書有女傳唯應千載下配食雪堂仙

君與何立

可皆江淮同幕
相繼沒於齊安

寄永嘉王侍郎

珍重西清老書來訪薛蘿為邦應好在作佛竟如何花

押常衙少柑香靜坐多聞公鬚尚黑未害小婆婆

秋熱憶舊遊二首

憶昔浮江更涉淮早秋天氣最佳哉塞垣榆落蟬初少
澤國蘆疎雁已來風露入懷詩筆健關山滿目笛聲哀
南州九月猶絺綌縱有清樽底處開

塞上秋光冷似冰當年豪舉氣憑陵打毬不用尖方馬
按獵初調異國鷹山塞淒涼聞戍鼓水村搖落見漁燈
而今病暍茅簷底追記猶堪洗鬱蒸

哭李景溫架閣大有

挾策說荊州那知亦暗投
漫招溫處士幾殺杜參謀
出幕有清議還鄉空白頭
人間容不得下與阿翁遊

建炎丞相

其祖也

送鄭端州起沃

想入漳潮境牙旗夾路紅
帝方憂瘴俗君可惠清風
海有沉珠戶巖無斷硯工
他年循吏傳要雜古人中

送方子約赴衢教符

博士非如吏巍然道自居諸生趨避席太守揖升車朱
筆濃批卷青燈細勘書漢庭重文藻行矣召嚴徐

李園有懷孚若

曾與山公醉不歸李園水竹尚依稀鈿車疾取春鶯唱
鐵笛潛驚宿鳥飛昔把蟹螯同酒琖今持馬策叩城扉
溪頭一片無情月偏照愁人淚滿衣

送方阜高赴衡州法掾

仕不論高下絲毫要及民君其守三尺古有活千人獄

樹侵雲杪江離滿水濱楚芳饑可薦切莫嘆清貧

答教茂才

器之
猶子

太傅品胡兒樊川譽阿宜既為諸父賞焉用外人知曉
月家山夢秋風客舍詩桐城逢汝伯一為說相思

失貓

飼養年深性已馴攀牆上樹可曾嗔擊鮮偶羨隣翁富
食淡因嫌舊主貧蛙跳堦庭殊得意鼠行几案若無人
籬間薄荷堪謀醉何必區區慕細鱗

送張應斗還番陽

蕉荔漫山霧雨繁
虬鬚客子悔南轅
久留閩國誰堪語
却憶番君可與言
豪傑雖窮留氣在
聖賢不死有書存
歸時洗換征衣了
揀箇深山緊閉門

為圃二首

屋邊廢地稍平治
裝點風光要自怡
愛敬古梅如宿士
護持新筍似嬰兒
花窠易買姑添價
亭子難營且築基
老矣四科無入處
旋鉏小圃學樊遲

衰病歸來占把茅，譬如僧葺退居寮。
因存橘樹斜通徑，怕礙荷花小著橋。
古有功名興釣築，今無物色到漁樵。
可憐歲晚閒雙手，種罷蕪菁擷菊苗。

送黃舒文赴欽教

壁

博士文中虎垂髻，已定交雅宜對紅藥。
胡乃涉黃茅薄，有先生飯全無弟子嘲。
猶勝迂濶者，荷鍾墾荒郊。

輓袁侍郎二首

華髮始遭逢，其如道不同。
可曾留孟叟，俄已罷申公。
諫

草多傳出經疑盡解通豈無南董氏奮筆紀孤忠
遺誥兼新訃同時至華門龍髯先帝遠鮐背幾公存方
恨三旌晚俄驚一鑑昏潜然關世道不是哭私恩

教器之宅子落成

臞翁卜築向東臯小憩江湖半世勞
遶屋樹陰供杖屨登樓山色發詩騷
客來賀厦杯行闊市寫拋梁紙價高
白虎漸臺何處在不如茅舍尚堅牢

答陳珍

寂寂少遊從斯人未易逢清貧今仲子疎雋小元龍君
謹題詩筆吾當避箭鋒勉旃鳴盛世切勿效寒蛩

輓表叔趙君任安撫二首

綸忠
簡孫

丞相規恢策家庭已習聞寧論乘一障真可帥中軍玉
塵無能對金錢有即分心知伏波病多半為忠勤

叔在兵間日書常笑我孱初云機會易晚嘆事功難寂
寞郎官省荒涼上將壇遙憐會稽窳新種短松寒

池上榴花一本盛開

炎州氣序異十月榴始華是誰初植此石罅抽根斜綠
陰蔽朝曦朱艷奪暮霞始猶一二枝俄已千百葩染人
不能就畫史無以加洛陽擅牡丹久已埋龍沙蜀州誇
海棠邈然隔夔巴安知籬壁間亦有尤物耶坐令農圃
室化為金張家詩人好模擬凍蕊并寒槎斯篇倘令見
無乃譏吾奢

蘇李泣別圖

方孚若故物
近為人取去

風雲慘淒草樹枯死笳鳴馬嘶弦驚鵲起熟看境色非

人間祁連山下想如此手持尊酒別故人此生再面真
無因匈奴漢使俱動色路旁觀者為悲辛歸來暗灑茂
陵淚子孟少叔方用事白頭屬國冷如冰空使穹廬嘆
忠義茫茫事往賴畫存每愁歲久縑素昏即今畫亦落
人手古意淒涼誰復論

芙蓉二絕

湖上秋風起棹歌萬株映柳更依荷老來不作繁華夢
一樹池邊已覺多

池上秋開一兩叢未妨冷淡伴詩翁而今縱有看花意
不愛深紅愛淺紅

鄒甫田見傳葵書

應博

令君葵說其傳遠一字真堪直一緘惜似辨才藏禊帖
愛如房相筆楞嚴畧疎脫誤煩重校盡扣精微恐不廉
欲卜寢丘何處是憑高試為指東崦

輓鄭參議

浦

同榜飛騰盡君初拜小侯地寒推易去天遠借難留新

隴家山畔生祠嶺海頭歷官如杜老白首止參謀

同鄭君瑞出瀨溪即事十首

方孚若
新阡

汗血名駒白玉鞭本初父子喜華鮮只今無復狂遊侶
自卸驢鞍古店前

妓有香分客有魚主君頭白總因渠枯楊此日悲風起
寂寞無人哭墓廬

元凱平生以智推今看往事一何痴山頭螭首猶蕪沒
那有人看水底碑

昔結精廬在半崖苔扉無主闔還開近聞有虎為看守
應是防閑俗子來

豪士寧淪鬼趣中曼卿昔去管芙蓉君今定作梅花主
來往山間倘一逢

藁裡而掩古無譏何必封崇揭禍機到得珠襦金盃出
始知羸葬不為非

古于生死驗交情何況臺歌沼漸平不是劉君同鄭老
苔深草合斷人行

鐵馬防秋記昔曾
晚途消縮似寒蠅
同時校尉俱封拜
誰伴將軍獵霸陵

北耗而今杳不知
路旁羽檄走無時
自憐滿鏡星星髮
羞見官中募士旗

老奴昔逐我西東
捷似猿猱跳絕峯
今日道旁扶一拐
乃公安得不龍鍾

教茂才論詩

詩道不勝玄難於問性
天莫求隣媪誦姑什
後儒箋至

質翻如俚尤癯始似仙吾非肝肺異先得子同然

鎖諫圖

讜言直觸大單于賴有關氏上諫書若把漢唐宮苑比
玉環飛燕總輸渠

哭劉連江

世鈞

晚唐才調晉風期一片胸襟頗涉奇每過隣家因貰酒
偶添別墅為羸棋議郎秩淺無超拜令尹官清有去思
種得花成身不見江邊父老至今悲

明皇按樂圖

鶯啼花開春晝遲掖庭無事方遨嬉廣平策免曲江去
十郎談笑居臺司屏間無逸不復覩教雞能鬪馬能舞
嗚呼寧哥吹玉笛催喚花奴打羯鼓南衙羣臣朝玉陛
老伶巨璫前後趨阿瞞半醉倚玉座袖有曲譜無諫書
金盆皇孫真龍種浴罷六宮競圍擁惜哉傍有錦綳兒
蹴破咸秦跳河隴古來治亂本無常東封未了西幸忙
輦邊貴人亦何罪禍胎似在偃月堂今人不識前朝事

但見斷縑妝束異，豈知當日亂離人。
說著開元總垂淚。

哭李公晦二首

沒於辰州

不會蒼天意，令君死五谿。
小曾留洛下，晚乃相膠西。
白首尊師說，丹心對御題。
悲乎成底事，路遠客魂迷。

洲邊三畝宅，有竹有梅花。
豈不堪名世，如何勿起家。
身纔著朱綬，州謾出丹砂。
渺渺重湖外，悲風咽暮笳。

送鄒莆田

日日焚香出天知，令尹心租符環境。
少花判入人深發。

路唯詩卷搬家亦俸金極為鄉井惜不是愴分襟

即事四首

買得荒郊五畝餘旋營花木置琴書柳能樊圃猶須種
蘭縱當門亦不鋤無力改牆姑覆草多方存井要澆蔬
區區才志聊如此誰謂先生廣且疎

目為詩客不勝慚喚作園翁定自堪抱甕荷鋤非鄙事
栽花移竹似清談野人只識羹芹美相國安知食笋甘
富鄭公事晚覺齊民書最要惜無幽士肯同參

牆角新開白版扉時尋樵牧弄烟霏代耕豈若收躬稼
賜帛何如出自機湖海浪遊今已倦山林獨往未全非
百年只願身強健長為慈親負米歸

待鑿新池引一灣更規高阜敞三間縮牆恐犯鄰家地
減樹圖看屋後山身隱免貽千載笑書成猶要十年閒
門前驀有相尋者只說翁今怕往還

梅花五首

彷彿瑤姬擁仗來
茆簷化作玉樓臺
平明遶砌圓殘夢

元是梅花數樹開

糝地紛紛著樹稀
歲華搖落慘將歸
世間尤物難調護
寒怕開遲暖怕飛

籬邊屋角立多時
試為騷人拾棄遺
不信西湖高士死
梅花寂寞便無詩

肯因冷淡怨年芳
霜滿寒林月滿塘
至白世間唯玉雪
不如伊處為無香

夜來幾陣隔窓風
便恐明朝已掃空
點在青苔真可惜

不如吹入酒杯中

送邢仙遊

興祖

彼美邢侯者逢人滿口誇有恩沾小戶無勢撓公家拔
盡民間薤栽添境內花吾詩采清論一字不曾加

夜登甘露山二首

小家三兩戶荒巘萬千重有月犬時吠無人泉自春
月落宿禽起幽人殊未迴不知何處磬迢遞過山來

書事二首

竭海夷山氣力雄只愁無術駐顏紅却須擘劃千餘歲

多買丹砂置女僮

章子厚云人生豈不能擘劃得二三百歲

因治陶朱術太精世間無物足經營更將郭璞書頻看
只恐青山盡鑿平

後村集卷七

欽定四庫全書

後村集卷八

宋 劉克莊 撰

詩

送權郡詹通判

鎮靜一如無頌條甫月餘來唯居傳舍去不識兵厨健
判風生筆精祈雨灑車丈夫何必假行矣兩輪朱

再題鍾賢良詠歸堂

伏羲以來凡幾年六經之外凡幾書人間簡冊渺烟海

君以約法包無餘往年華轂臨敝廬舌端霆卷俄電舒
平欺賈董等下駟冷笑伏鄭真蠹魚千詢萬扣答如響
捫腹始媿吾空虛伯高辟易李度走六論三策何時攄
又言諸子皆大夫經笥府庫隨所須觀君毛骨老猶爾
惜也未見雛與駒方今主相求極諫君曷不攜軾轍俱
自云素鄙縱橫學尚友洙泗談古初堂堂冕輅豈不好
却慕點也寧非迂行當端委秉周禮未可春服從魯儒

送洪使君

雖擁朱轡貴清癯兩鬢霜判花人競誦詩草士深藏農
飽因蠲賦州貧為救荒公歸無媿面應可見嚴光

送陳魯叟使君赴廣西漕

闔郡留無計匆匆奪父師使君三月政遺老百年思遠
宦生華髮輕裝載舊碑海山應有恨未得謝公詩

韓杜曾遊處君行得細尋那知瘴烟裏忽有福星臨竭
海求珠蚌搜山採翠禽定將水與磔一洗濁夫心

永嘉黃九萬見訪

避暑推高卧柴門閉不通子來佩明月予起濯清風有
野猶當贈無城可得攻靈舒如見問今作灌園翁

別宋弼文叔

天下書無數君專治四書因留精舍久遂向舉場疎山
路挑包去秋風罷講餘故園荒草合似欠一番鋤

熊主簿示梅花十絕至梅花已過因觀海棠輒
次其韻

萬蕊千葩染似紅停盃無語恨東風薄寒且為花愁惱

何況開時值雨中

紅點霏霏似撒沙
荒園幻作五侯家
自憐改盡青青鬢
無力栽花且看花

幾樹繁紅映碧灣
亭蘿山下見芳顏
分明消得黃金屋
却墮荒谿野徑間

顛風猛雨阻追攀
欲問春留數日間
過眼紅雲成白雪
到晴祇恐沒花看

梅太酸寒蘭太清
海棠方可入丹青
趙昌骨朽徐熙死

誰寫春風上錦屏

特以穠纖壓衆芳
痴人痴殺恨無香
問渠嫵媚房櫳裏
何似莊嚴几研傍

共倒殘尊過日西
重來花事想參差
建陽主簿今才子
焉可無詩補杜詩

歸騎何須抵死催
且拈落蕊藉蒼苔
平生酷喜坡長句
筆力今誰可奪胎

暮雨廉纖似入梅
一春花月欠攀陪
草生後圃深三尺

也道身為縣令來

海棠洞下醉忘歸歲月如馳不可追想得千株今合抱
此生未卜再遊時

再和十首

色深乍擣守宮紅片細俄隨蛺蝶風到得離披無意緒
精神全在半開中

薔薇難比況金沙一種風標富貴家我有公評君記取
惜花須惜海棠花

千株絳雪照滄灣
應笑劉郎帶老顏
尚有少年情味在
戲搜綺語續花間

鳳州宮柳昔曾攀
亦醉瓊花芍藥間
獨有海棠心未足
每逢多處必來看

別園水竹絕幽清
花徑繁紅蘚砌青
何處貴游開步障
誰家生色畫深屏

徙倚溪亭惜墜芳
恨無異域返魂香
殘枝併恐風吹去
插在金瓶置座旁

忽憶聯鞍過水西重尋前約未參差祇愁人識風流罪
屢出看花數賦詩

淡賞無煩羯鼓催解鞍便可坐莓苔莫將花與楊妃比
能與三郎作禍胎

旋挑野菜拾青梅又向花邊得暫陪各選一枝簪白髮
明年知與阿誰來

君憶東湖不久歸我思陳迹恍難追殷勤為報鶯花說
止有詩情似舊時

水心先生為趙振文作馬塢歌次韻

洛陽牡丹隔萬里棘荒姚魏扶不起馬塢近在杭州陌
野人只向詩中識勾朱傳粉初窺牆海棠為屋辛夷房
千林春色已呈露一株國艷猶閼藏多情荀令香透袖
俊遊恐落都人後搖鞭深入紅雲鄉解衣旋貰黃騰酒
淮南芍藥初過兵人生何必塞上行墜茵委壤各有命
肯學凍士鳴不平移家欲傍園翁住手開蕪地通蘋渚
尋芳栩栩起蝶飛逐臭紛紛憐蚋聚君不見玄都吟筆

妙燕許詩人却遣世人怒君若拏舟獨往時我亦荷鋤
從此去

贈高九萬并寄孫季蕃二首

諸人凋落盡高叟亦中年行世有千首買山無一錢紫
髯長拂地白眼冷看天古道微如綫吾儕各勉旃

菊磴說花翁飄蓬向浙中無書上皇帝有句惱天公世
事年年異詩人個個窮築臺并下榻今豈乏英雄

題何秀才詩禪方丈

景建談之子詩禪丈室寬能將鉛槧事止作葛藤看壞
衲蒙頭易玄機得髓難何因清夜話分我一蒲團

輓邵武洪倅

不識監州面聞名似舊知空餘商榷恨竟失合并時昔
作大蘇客今觀小謝詩西風丹旆過一為士林悲

輓夔漕王中甫二首

羽書堆裏挾遺編往古來今盡粲然白髮晚持川口節
丹旌暑下峽門船生前多半遊榆塞身後纔方領木天

老去一雙懷舊淚誰知滴向建溪邊

半瓢丹藥一筇枝萬里西來撫字悲
綬著藏中公事定
劔鳴匣內我年衰可憐檄筆今零落尚記綸巾共指麾
身在滄洲搔白首斷腸吟就八哀詩

輓葉潛仲運幹二首

知剛

雖出自貂蟬清貧雪滿顛若無槐簡後一似布衣然
讀久遺編絕藏深拱壁全悲呼如此士不貴又無年

俱入平蠻幙同登出嶺舟交情傾蓋盡世事闔棺休客

致生芻去家唯斷藁留遙知風雨夜愁絕老叅謀

送熊主簿

邑事多商榷唯詩未暇論毋慈催扇枕父老謾攀轅新
戍謀何地初程宿某村西風有來雁書札倘相存

送徐夏叔

昔與長君親今方識少君極知皆造理何止並能文讀
罷湘中雪吟開嶽頂雲老余才思竭搔首念離羣

和答北山

北山當代文章祖孔思周情幸未泯弟子力疲心尚在
先生齒宿意逾新今無斷鼻成風手古有埋腰立雪人
不向師門勤稽首一生懷抱對誰伸

輓樓暘叔二首

白首臨凋瘵薶鹽似舊時僅持一麾止安用五車為庫
有留州賦家無葬地資空餘清儉字長使郡人思

平生所歷最崎嶇不覺周南歲月深拙官元無金潤屋
悼亡新有雪盈簪淒淒德曜齊眉案草草黔婁覆首衾

曾忝郡民漸教化眼看雙旂一霑襟

勞農二首

江浙膏腴動渺然唯閩磽薄少平川可憐老子扶凋邑
絕似吾民墾瘠田稍喜一犁翻宿雨聊為三爵禮高年
太平王相調元氣春在桑畦麥隴邊

畫簷一夜雨飄蕭際曉陰霾掃碧霄有日暫看旗脚展
無風初覺鼓聲調紛紛竭作趨南畝稍稍新妝出北橋
白髮長官塵土殺尚能覓句補風謠

答惠州曾使君韻二首

瀟灑使君風度峻神仙謫墮在人間只今坐歎凝香處
帝賜羅浮作鎮山

先賢平易以觀詩不曉尖新與崛竒若似後儒穿鑿說
古人字字總堪疑

送參議滕告院掛冠

由來恬退士史冊亦稀疎唐有楊少尹漢唯疏大夫翁
能辭祿去我欲殺青書今世無名筆誰為寫作圖

輓建昌詹使君二首

八民

南渡釣樞後宣和節義門依然窶人子不似貴公孫苦
李無誰採甘棠在處存遙知宦遊地巷哭更招魂
稍喜佩銅魚遭迴四紀餘早無人料理晚有鬼揶揄把
酒言猶在凝香夢竟虛斯人只如此恐坐太清臞

和葉尚書解印二首

郡人不識疾呼聲甘雨和風徧一城歲久偏多遺愛事
天高未察借留情舟行精舍漁歌晚家近華亭鶴唳清

莫比歸雲并倦翼先生此念素來輕

倦入承明聽履聲朱轡今復厭專城
盪胸太華供吟興
照眼伊川洗宦情
尊繪何慚高士決
琴龜不減昔賢清
未應便葺東山墅
出處方闕世重輕

送葉尚書奉祠二首

先生清夢繞林泉
黃紙除書拜地仙
報答吾君吾相了
徜徉某水某丘邊
事光白傳求閒後
銜似溫公約史年

溫公領崇福
祠十五年

笑向故山猿鶴說
古來晚節幾人全

身於七邑最孤寒每辱黃堂刮眼看乍可郡無九年蓄
要令民受一分寬公閒去伴种司諫我懶思尋靖長官
曾出龍門稱弟子感知微有寸心丹

輓盧母黃太孺人

少逸之妻

太孺賢聲衆論推府君經學里人師牛衣隱約能偕老
螢火淒涼自課兒疇昔黃齋曾百甕只今丹桂已雙枝
嗚呼盧母哀榮甚何必人題墓上碑

寄熊主簿

一出懸知計已非更堪留滯未成歸只今白首負松菊
何處青山無薜薇不恨老從中歲至但悲事與素心違
當齋寂寞生青草幾度臨風憶杜微

薄廡有當齋取會
計當之義朱文公

扁書

寄徐夏叔

曾識徐卿二子奇秋來往往夢瓊枝明時莫作沉湘賦
暇日應題望嶽詩主愛客卿寧忍舍兄嗟余季若為思
湖南歲晚多迴雁頻寄書歸慰別離

贈趙醫立之

世醫多孟浪趙子獨專精術穩常無悞能高素有名方
書真爛熟裘馬極鮮明自笑貧兼病將何贈宋清

與北山陳龍圖

小兒膽大說文章螢火難爭兩曜光侍講先生今寂寂
龍圖老子尚堂堂隣無羊仲并求仲家有元方與季方
想見瘦梅疎竹下深衣如雪鬢鬚蒼

答陳龍圖

耆舊凋零盡吾猶及太丘豈云清易挹自是廣難周尚
綱煩翁教書紳到老休何由陪几杖共看海山秋

和趙吉州三首

學者當窮理工詩豈美名不能裨采訪徒自取譏評責
已希韋孟休官慕向平如今成病鶴垂首噤無聲

憔悴東陽令區區謾自疲斷無問牛智寧受放魚欺儉
陋交游笑低平父老知向來子元子彷彿是吾師

今代廬陵牧蒼生屬意深胸中絲補衮肘後藥成金僕

自操齋瑟公宜和舜琴篝燈精舍裏何日共論心

輓傅諫議三首

昔事先皇帝堂堂立玉墀進懷伏蒲疏退誦考槃詩哀
郢遺言切憂周素髮垂他年耆舊傳此筆屬諸誰

今上龍飛始先生驛召頻頗聞曾草疏終不就蒲輪勘
破邯鄲夢抽回浴社身也令千載下知世有全人

憶昔南山寺微言叩未終晚猶溫薦語病尚寄書筒駿
廐誰收我慕陵合殉公春風溪上淚還與海潮東

寄二徐

珍重渠家大小君分明二陸是前身遙知洛下傾城看
錦樣文章玉樣人

答畱通判元崇

不見龍驤與驥馳紛紛蟲篆鬬蛛絲君侯傑出南方者
老僕終當北面之憶玉樹枝勞遠夢薰薷薇水讀來詩
自慚眼力非關令紫氣浮空惜不知

以王家酒寄陳北山得二絕句誚酒味不如舊

日之勁峭用韵二首

先生詩酒令俱嚴一掃哇簧與市帘
大才高今吏部故應笑少更嫌甜

醇醪易入醉人鄉勁酒難逢醒者嘗
玉媪區區真小點隨時增損甕中方

和北山一首

幅巾高蹈挹洪崖閒灑銀鈎著玉杯
文律不論先漢後詩源遠自國風來
却愁小子方攻冉未必吾師肯鑄回

極欲去修牀下拜扁舟歸夢繞南臺

送建安鄭尉

路人能說尉一似建溪清寸錦不攜去束書相伴行無
心千舉將有面見賢兄應笑東陽令淹留白髮生

答范叔範

闊矣別離久颯焉顏髮蒼殷勤大范子問訊老劉郎渴
睡添新嬾清談減昔狂今無望氣者寶劍且深藏

送楊休文

寂寞鰥翁揜縣齋吏傳刺字睡驚回自從黃鶴仙人去
誰遣青牛道士來適夢羽衣良有驗共吟石鼎媿無才
殷勤問訊西山老何日山中伴訪梅

答羅天驥

乃祖曾吞鳳郎君豈後身頗聞精選理何必慕唐人玉
塵王夷甫烏絛呂洞賓客談溪墅勝終擬卜比隣

太守林太博贈瑞香花

一樹婆娑整復斜使君輟贈到田家自慚甕牖繩樞子

不稱香囊錦傘花小借煖風為破萼旋澆新水待抽芽
丁寧童子勤封植留與甘棠一樣誇

再和

壞徑泥深古檻斜居然幻作貴游家小亭自課僮鉏草
空室俄驚女散花便覺麝囊無遠韻頻挑蟻壺有新芽
紫微紅藥催公去獨許詩留野老誇

三和

吏散庭空戟影斜吟牋飛到野人家隋珠和璧難酬價

禪榻茶甌忒負花譜欠名人為品藻詩因尤物始萌芽
近公匹似薰班馬荀令風流未足誇

四和

吟諷攀翻到月斜衆驚奇寶聚貧家高才盍視宮中草
退士聊看屋角花未必園丁諳樹性更愁墨客笑薑芽
畫堂金鼎薰蘭麝豈有天然韻可誇

五和

幾點朝來小雨斜未應造物妬山家陡驚春報千林信

擬問天留數日花寫物祇今須老筆染根何處有靈芽
彩雲過眼真如夢著意追攀豈好誇

六和

拙筆蕪辭字半斜情知見笑大方家放教吉甫獨哦句
除却微之誰別花勾引親朋需果核提防風日損根芽
玉津應制須公等林下樵歌敢自誇

七和

短牋小草墨痕斜句法來從和靖家吟賞豈無神助筆

護持疑有物司花莫因山鳥題榕樹便憶河豚飽荻芽
多少邦人霑賸馥願碑遺愛永傳誇

和趙南塘離支五絕

側生海畔遠難將風日猶能變色漿借問驛馳丞相府
何如輦致道山堂

却貢無因送上天漫山如錦但堪憐羅浮所產真奴隸
只為曾逢玉局仙

十顆千錢品最珍北人鮎背未濡脣若生京洛豪華土

買斷丹林肯算緡

皺王盛時
額值百錢

輦轂嘗新著價高
土人棄擲等弁髦
不嗔園客工偷竊
絕喜天公享老饕

風韻能令百果低
難將盧橘闕新奇
品題自合還詩祖
模寫何須覓畫師

築城行

萬夫喧喧不停杵
杵聲丁丁驚后土
徧村開田起甍竈
望青斫木作樓櫓
天寒日短工役急
白棒訶責如風雨

欽定四庫全書

漢家丞相方憂邊築城功高除美官舊時廣野無城處
而今烽火列屯戍君不見高城齧齧如魚鱗城中蕭疎
空無人

開壕行

前人築城爵已高後人下車來開壕畫圖先至中書省
諸公聚看稱賢勞壕深數丈周十里役兵大半化為鬼
傳聞又起旁縣夫鑿教四面皆成水何時此地不為邊
使我地脉重相連

運糧行

極邊官軍守戰場次邊丁壯俱運糧縣符旁午催調發
大車小車聲軋軋霜寒晷短路又滑擔夫肩穿牛蹄脫
嗚呼漢軍何日屯渭濱營中子弟皆耕人

苦寒行

十月邊頭風色惡官軍身上衣裘薄押衣勅使來不來
夜長甲冷睡難著長安城中多熱官朱門日高未啓關
重重幃箔施屏山中酒不知屏外寒

國殤行

官軍半夜血戰來平明軍中收遺骸埋時先剝身上甲
標成叢塚高崔嵬姓名虛掛陣亡籍家寒無俸孤無澤
嗚呼諸將官日穹豈知萬鬼號陰風

軍中樂

行營面面設刁斗帳門深深萬人守將軍貴重不據鞍
夜夜發兵防隘口自言敵畏不敢犯射麋捕鹿來行酒
更闌酒醒山月落綵縑百段支女樂誰知營中血戰人

無錢得合金瘡藥

寄衣曲

征夫去時著紵葛征夫未回天雨雪夜呵刀尺製寒衣
兒小却倩人封題上有淚痕不教洗征夫見時認針指
殷勤著向邊城裏莫遣寒風吹膝理江南江北一水間
古人萬里戍玉關

大梁老人行

大梁宮中設毡屋大梁少年新結束少年嘻笑老人悲

尚記二帝蒙塵時
嗚呼國君之仇通百世無人按劍決
大議

朝陵行

國家諸陵陷河北盜發寶衣斧陵木
或言陵下往來人
夜聞翁仲草間哭何年却遣朝陵官
含桃璀璨登金盤
悲哉人家墳塚各有主誰修永昌一抔土

破陣曲

黃旗一片邊頭迴
兩河百郡送款來
至尊御殿受捷奏

六軍張凱聲如雷
元戎劍履雲臺上
麾下偏裨皆將相
腐儒筆力尚跌宕
燕山之銘高十丈

村居書事四首

有客相逢說坎離
葫蘆中藥不容窺
扣頭無力營丹竈
聊奉先生一醉資

新剝闍黎頂尚青
滿村看說法華經
安知世有彌天釋
萬衲如雲座下聽

卜叟囊書繫肘邊
兒童尊信等神仙
立談算盡平生事

問到封侯拜相年

刮膜神方直萬金國醫曾費一生心
可憐髻髻提籃者
也有盲人問點鍼



後村集卷八

欽定四庫全書

集部

後村集卷十九

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣金拱闇

欽定四庫全書

後村集卷九

宋 劉克莊 撰

詩

輓陳北山二首

雖拜龍圖號自稱槃澗翁生難招此老死可見文公斷
簡工夫久深衣笑語終空餘藏藁在虹氣貫山中

握筆臨池慣殘書映雪勤今寧無古篆宋復有唐文荒
草周顒宅空山董相墳作時携斗酒一酌墨溪雲

送五六弟赴四明倉官

歲

子去為倉氏人應重客卿須憐春簸苦勿愛金鍾羸羊
貴脾神厄復佳肺氣平親闈最關念頻寄雁傳聲

輓龔汀州二首

早日曾廬墓中年懶建牙的無金遺子僅有笏傳家窮
巷觀時事叢祠閱歲華天平清白吏名位止斯耶

所守老猶剛清風凜不亡洞房無粉黛堊室屏緇黃東
閣遵遺令南山獻吉藏百年耆舊盡里社轉淒涼

送戴復古謁陳延平

倉部當今第一流，艱難有詔起分憂。
城危如卵支羣盜，膽大於身蔽上游。
應是孔明親治事，豈無子美可參謀。
君行必上轅門謁，為說披蓑美釣舟。

輓外舅林明道二首

關處功名少，閒中歲月長。
漢曾招綺季，魯僅有靈光。
玉雪生難浣，淵冰死未忘。
兩州殘父老，懷惠各悲涼。
少小親函丈，而今白髮生。
居然明我穢，久矣愧翁清。
川

逝悲賢淑山頽惜老成年來得瘖疾相輓不能鳴

東陳寺丞築城

事變相尋智亦新
爛泥堆起石嶙峋
斷無餘力謀蒸土
頗有旁觀哂寘薪
自古虛心容議者
即今枵腹役耕民
姑尤聊攝皆齊境
莫遣郊封有詛人

答楊昇

一生忠孝發於詩
不為桃根與柳枝
棗本流傳容有偽
箋家穿鑿苦求奇
偶全要領慚輕典
虛嘔心肝悔少時

澤畔累臣搔白首孤吟不敢累親知

輓方岳倅

昨解巴陵紱將尋洛社盟壁埋真可惜玉立尚如生舊
轍冰天遠新塋雪瀨清唯應帶來鶴解作斷腸聲

梅雨隴城自用前韵

疊石黏灰事尚新忽因霑漬減嶙峋晉陽昔僅存三板
瓠子今誰助束薪恃陋竊憂難禦寇加工却恐倍勞民
狂生亦豈前知者曾是邊城荷杵人

跋某人詩卷

元祐賦律古熙寧經義新請君忙改藝詩好誤終身

城壞復修又賦

補罅扶傾手段新舉頭千丈又嶙峋主謀何止堪尸祝
妄議真當抵鬼薪見說傳更增邏卒已聞犯夜少奸民
小偷不辦公輸械遙望須驚彼有人

留山間種藝十絕

梅

鄙事闕人智淺深漆堪成器楮堪衾自憐到死猶迂闊
純種梅花作墓林

菊

羞與春花艷冶同殷勤培養待秋風不須牽引淵明比
隨分籬邊要幾叢

松

一生著數落人先白髮栽松故可憐待得伏苓堪采掘
此翁久矣作飛仙

蘭

蕭艾敷榮各有時
深藏芳潔欲奚為
世間鼻孔無憑據
且伴幽窗讀楚詞

桃

歲歲春風花覆牆
摘來紅實亦甘香
當時若種瑤池本
却恐河清未得嘗

桂

謔言自昔架空虛
薏苡非珠偶似珠
半夜庭中金屑滿

老夫明日費分疏

柚

滿樹亭亭蘚砌傍
未論包貢奉君王
世無班馬堪薰炙
且嗅幽花亦自香

笑花

春風滿面喜津津
縱有嗔拳不忍嗔
尚恐傍觀安注腳
笑他何事與何人

茉莉

一卉能令一室香
炎天猶覺玉肌涼
野人不敢煩天女
自折瓊枝置枕傍

芭蕉

攪醉方眠挾雨聲
碧叢宜看不宜聽
而今一任瀟瀟滴
華髮鰥翁徹夜醒

寄題邵武死事胡將祠堂

士各全軀命唯侯
視死輕張巡鬚盡
怒先軫面如生短
刃猶梟寇空峯尚
背城新祠簫鼓盛
人敬比神明

寄題沙縣死事祝將祠堂

文尉之子

淮右多良將吾猶識祝侯虎生能肉食豹死有皮留鐵

漢為揮涕冰翁與雪仇

童侯獲賊剖心以祭

標名忠義傳榮甚復

何求

輓王簡卿侍郎三首

先帝初更化公曾以諫聞身雖遷柱史袖尚有彈文晚
境圖成佛他山預作墳那知非變幻止在石橋雲

未著猶竒特杯行忽坐亡無香分侍女有硯遺諸郎長

樂旌旗改平泉竹石荒公今呼不應浮議果何傷
已矣孤知已顏蒼髮髮稀雖曾參話柄終未契禪機尚
欲扁舟訪俄傳隻履歸無因拜公墓稽首懺前非

題高九萬菊磻

胡公飲菊潭八十冠貂蟬高叟飲菊磻六十雪滿顛胡
公死無名高叟生無權權隨糞土盡名與穹壤傳劉生
勸高叟世事不兩全饑且拾落英渴且斟寒泉快吟三
千篇多活五百年

輓陳師復寺丞二首

已奏囊封墨尚新又攜袖疏榻前陳小臣憂國言無隱
先帝如天笑不嗔闕下舉幡空太學路傍卧轍幾遺民
愚儒未解天公意偏壽他人天此人

晚歲滄洲築草堂却將逢掖換軒裳市朝共嘆鳳高翥
世俗或疑麟不祥童子舉扶猶忼慨門人要經各淒涼
衰殘無復相鐫切遺墨常留几案傍

別高九萬

花翁徒步悲詩境菊磴春糧哭復齋衆客食魚彈鋏去
幾人白馬素車來尋思舊事成三嘆斷送諸賢入八哀
信矣兩生俱烈士有金當為築高臺

贈建陽醫士楊椿老二首

當年琴調絕平平妄意先賢宰武城邑有澹臺猶欠識
始知令尹未聰明

晚愛聃書義味長無身始與患相忘殘年頗覺饑難忍
未敢貪君不死方

輓潘柄

復齋之客潘夫子生死相從未忍分
薛守頗曾叅道潔
志完何可欠承君
魯生邀飲猶同去
龐嫂來呼已不

聞敢舍一卮
真永訣老無脚力拜翁墳

袁溉字道潔薛常州季宣從之

學
易

贈輝書記二首

野老柴門不慣開
有僧飛錫自天臺
前身莫是寒山子
攜得清詩滿袖來

棒喝機鋒捷似飛推敲事業費尋思師歸定被叢林笑
腹裏無禪却有詩

答黃鏞

少年妄意假韶鳴憂患欺人兩鬢星此去真當盟社友
向來不合誑山靈百年似夜何由旦萬古如天只麼青
若到桐城逢舊友為言多醉少曾醒

答陳琕主簿

主簿佳公子何曾染綺紈果能磨鐵硯真可歆銅盤君

壯雷驚蟄吾衰月闕團

太玄云月缺其團不如開明於西

家貧無瑤貝

珍貺欲耐難

寄題南康胡氏春風堂

芋魁菜甲必同食石田茅屋不忍析有時對牀聽風雨
有時共燈窺簡冊大凡獨抱古人道羣季各修弟子職
一門和氣常如春紫荊花開庭草碧宛然生在舞雩時
又若坐於明道側吾嘗三復棠棣詩周公千載有慚色
共梨分棗能幾何摘瓜煮豆堪太息區區錐刀未足讓

伯夷遜國采薇喫君能聚族真卓行余亦為兄愧涼德
暮年有意觀廬山因作春風堂上客

送孫明府

兄弟繼
為邑宰

三年於赤子摩拊極殷勤令尹留方寸吾民受一分宛
如小滕國突過大馮君四境風謠美諸公必采聞

答陳璘司戶

丞相詩高妙諸孫亦復奇惠連康樂弟子美審言兒三
舍猶當避偏師未易支老來怯酌唱欲速反成遲

辛卯滿散天基節即事六首

老作黃冠返舊山尚支驛料破衙官孤臣毫髮皆君賜
獨坐風廊不覺寒

門廡無人殿未開白頭散吏久徘徊年年歲歲千秋節
長占羣官第一來

聞說都人競出嬉御街簫鼓倍年時相公入奏天顏喜
半夜揚州送捷旗

約已隆親禮不同鈞天無讌錫臣工太皇勲德侔高帝

陛下謙恭似孝宗

野衲云云祝聖躬亦拈拂子演宗風恨渠僻陋無聞見
不識光公與杲公

小臣無狀挂丹書還著青袍兩載餘物色依然如碧鶴
階銜久矣削緋魚

輓王華甫提刑二首

兄作
行狀

牛角從諸老麻衣客五侯風雲疑反手江海不迴頭寂
寂生堪笑皇皇死未酹空餘老知識閉戶著窮愁

何必求佳傳家庭論自工
潁濱碑玉局曲阜狀南豐
轡遠方追電箏調每值風
深知有遺恨不見捷旗紅

還黃鏞詩卷

曾伴靈芝湖上吟當年一
悟至如今源流不亂知歸
趣篇什無多見苦心貫虱
功夫須切近膾鯨力量要
雄深暮年誰可談茲事盍
有村醪且自斟

徐懋功餉酒用其韻

少時酒伴盡豪雄歲晚餅
壘一併空方嘆獨醒吟澤
畔

忽勤分餉到籬東鯢鯨有量真溟滓螟蠃無知妄異同
老矣此身何處著便應埋向醉鄉中

答陳琯修職

陳氏源流遠吾猶及紀羣昔唯知伯氏今又識郎君後
學尊師友先賢賤藝文滄洲書冊在努力緝前聞

輓陳孺人

昨弔空閨涕未收忍聞紉髮向斯丘不為尚子了家事
似與龐公圓話頭天下斷無膠可續人間最有劒難求

潘郎文筆猶宜誅想見親碑字字愁

壬辰春上冢五首

城南

一閉幽堂十九年萬松手種已參天
懶隨人乞郭東祭自與母耕綿上田
試問拂雲施鶴表何如藉地薦豚肩
此身只合安閭里長為先君掃墓阡

西樓

溪草林花爭碧紅傷心黃壤闕芳容
短松明月易陳迹

斷雨殘雲難覓蹤
伊昔老盆常共酌
即今敗絮倩誰縫
白間一斗倉陳粟
薄暮歸來獨自春

郭西

高大父

自古佳城屬吉人
郭書王識豈能神
掃松稍喜衣冠衆
薦芟何妨俎豆貧
委巷起家基世德
分山葬友等天倫
墓旁即是黃香冢
冥漠之中尚卜鄰

黃芻季楚名士也
死而無子大父葬

之於高
祖墓旁

中嶧

憶昨隆乾致太平諸賢聳聽鳳先鳴奏篇不愧登瀛選
拂袖難留出畫行當日伯夷兄弟瘦至今楊震子孫清
定知千載墓陵路尚有行人酌董生

壽溪

水如綬帶山如抱畫手難摹一段奇松下可澆三奠去
墓傍安用萬家為虹來昂首寧非瑞蛟徙無蹤若有知
總角釣游今白髮重尋陳迹不勝悲

魯大父臨終有虹入室墓前昔皆深

潭蛟所窟宅也

訪李鋼草堂不遇

細路縈紆入野田
遙瞻竹樹已欣然
青苔地滑跌盧老
蒼耳林深迷謫仙
不羨玉堂在天上
徑須茅屋占雲邊
極知謝客非為亢
貪看林花聽澗泉

題陳遂卿隱居

蚤日稱雄翰墨林
暮年里巷且浮沉
諸公自負遺賢媿
處士元無謗國心

杜牧送薛處士序處士之名自負也謗國也

子佩子衿輸

少俊某丘某水棟
幽深明時莫作逃
堯計忽有弓旌底

處尋

綿亭林逸人扁所居室曰藏暉求詩

先生讀易注參同築室雲山第幾重昔遇壺丘疑見怪
今於老子信猶龍方靈有物司丹竈符驗無妖血劍峰
只恐欲藏藏未得世人往往或知蹤

題白渡方氏聽蛙亭

塘水拍堤蝌蚪生想君亭子俯幽清黃梅雨足野田潤
牡麴烟收村墅晴莫信人嫌無理鬧頗疑渠有不平鳴

畫堂方喜調琴院誰愛天然律呂聲

贈鍾主簿父子

旗鈴接跡向西馳丹桂靈椿並一時競說郎君能跨竈
頗令老子欲笞兒妙年不患錐無穎前輩曾言木就規
相國晏公元楚產何須千里遠求師

寄趙簡叔知宗

造物方將貴此翁煌煌三印屈盤紅牋天下受珠犀
表海新兼鈇鉞雄詩滿名山留妙墨船歸外國說清風

何當把臂登雲榭共看鯨波浸碧空

贈豫知子

隔腹能知人肺肝
瞭如燭照與龜鑽
敏於一行推碁子
妙似堯夫測牡丹
道是鬼來疑太黠
驀然仙去覓應難
身今槁木寒灰樣
慚愧巫咸子細看

簡叔和詩再寄

棄置而今成禿翁
君恩量給太倉紅
著鞭縱落諸公後
揮麈猶堪一世雄
花月三千篇絕唱
海天九萬里剛風

胸中本自無冰炭況讀君詩一掃空

寄章貢姚別駕

贛江當日血成川誰肯身馳不測淵尺檄約降諸峒靜
單車擒畔一城全帶刀俗染唯新化橫槊詩看第幾編
想與元龍談世事亦憐疎拙老林泉

三寄簡叔

屢有詩貽田舍翁燈花常至夜深紅莫嫌雲榭文書冗
稍喜冰銜職任雄健吏安知元結事貪夫愧死伯夷風

得君厚祿吾何患從此樽中酒不空

寄章貢姚使君

贛在江西尤鉅麗極知君相選侯難昔多法從懷州紱
今少詩人上將壇斂戍官兵申折洗放衙溪洞報平安
衰顏欲納轅門謁却怕崆峒臘雪寒

將邁說易

新圖別義初拈出四座皆驚昔未聞定是胸中通象數
或於夢裏見義文向來夫子編三絕近世名儒說七分

自笑腐生尊古注可能挾策便從君

讀金鑾密記

仗下千官走似麕倉皇誰扈屬車塵禁中陸九艱危共
殿上朱三苦死嗔當日橫身抗岐汴暮年避地客甌閩
小窻細讀金鑾記始信香奩屬別人

香奩集和凝
作非致光也

哭鄭君瑞長官二首

自解銅章後終身恥折腰偶然安舊隱非不戀清朝
薪水纔能給弓旌未易招墳山梅似雪猶足配清標

史著陶潛卒何妨爵秩畢竟無乞米帖止有采薇詩舊
友曾為誄新阡尚欠碑中年哭同志孤立可勝悲

獲硯

二硯溫如玉琢成信知天地有精英馬肝紫潤猶宜沐
鵲眼青圓宛似生未愛潘郎呼作友便教米老拜為兄
今年幾案多奇獲應是窮儒命漸亨

再獲一硯自和

三硯聯翩買券成絕勝玉杵聘雲英拊摩無粟向肌起

塗抹有花從筆生韞匱每愁逢暴客傾囊或笑費方兄
古來事業由勤苦不信摩穿道不亨

蔡偉叔講通書

蔣君易學高無助蔡子重來講杏壇絳帳先生移席聽
青衿學士堵牆觀舉揚霽月光風易箋注先天太極難
穩坐虎皮揮麈尾豈知春雨客毡寒

遺編

短髮蕭蕭老日侵遺編未敢廢研尋薰蕕理欲迷通義

袞斧忠邪害恕心篤信聖賢常事左稍知治亂每憂深
人生有腹當盛酒誰遣吾儕著古今

一念

一念纔萌帝已臨豈容纖芥自欺心夜猶養氣操存熟
晨偶科頭警懼深跌宕少曾希管葛斂藏晚欲學柴參
小窻稍覺春宵冷自設篝鑪置楮衾

貧居自警三首

昨者匆匆擲印歸六年岑寂閉柴扉歲荒奴僅拾殘穗

日晏婢方羹苦薇寧渴莫賒鄰近酒儘寒不著借來衣
中年但祝身強健要卧松風坐釣磯

赤粟黃蘗味最深此生不恨老雲林鬼神每矚高明室
天地皆知暮夜金夸士燃臍猶殉貨先賢覆首或無衾
一瓢千駟同歸盡莫為浮雲錯動心

客過吾廬語至晡旋營鹽酪刈生芻酒兼鱗脯不時有
飯與魚羹何處無

荆公云何處無魚羹飯喫

力穡勿忘家世儉堆金

能使子孫愚俗兒未識貧中樂妄議書生骨相臞

寒食清明二首

寂寂柴門村落裏也教插柳記年華
禁烟不到粵人國上冢依稀龐老家
漢寢唐陵無麥飯山溪野徑有梨花
一樽徑藉青苔卧莫管城頭奏暮笳

過眼年光疾彈丸桐華半折燕初還
漢宮有燭朱門煖墨突無烟白屋寒
寧復鬪雞陪戲社頗思攜鶴訪孤山
今年秣與金同價偶得茅柴且盡歡

上巳

櫻筍登盤節物新一筇踏遍九州春似魯山陰訪修竹
不記水邊觀麗人豪飲自憐非少日俊遊亦恐是前身
暮歸尚有清狂態亂插山花滿角巾

村墅

村墅溪亭處處嬉新年海岱足猶夷盜平四野無驚柝
師出三邊有捷旗子美間關離亂際堯夫生死太平時
從今一洗窮愁語多賦看花飲酒詩

進德

進德功夫有淺深一毫間斷即差參醉無謬誤明持敬
怒亦中和見養心為善豈須朋友責積勤常若父師臨
向來歲月悠悠過垂老方知痛自箴

答梁文杓

二梁太學同袍舊晚識郎君亦雋才柳永詞堪腔裏唱
劉義詩自膽中來老夫一榻何曾下吾子扁舟作麼迴
見說銅城方調卒未應能築禮賢臺

哭章泉二首

自負簞瓢樂那須壁帛迎後凋仁者壽獨往聖之清古
不稱千駟今猶重兩生吾衰久無淚一慟為耆英

小扉通水竹幽絕少比鄰家似巢栖者詩非火食人於
今無宿士若昔有先民強作徵君誄居然語未親

贈馬相士二首

嫗貌何妨至輔臣猴形亦有上麒麟伏波眉目空如畫

不是雲臺劍佩人

唐人嘲歐陽詢云誰令
麟閣上畫此一獼猴

荀卿粗了心形者蒯徹安知背面哉別有精微書不載

待君見了李成來

余為建陽令遣小吏王堪為西山翁之役翁留
之仙遊山房招鶴亭之上令抄道書久之若有
所悟棄家不歸後六七年訪余田間敝裘跣足
真為道人矣自言欲謁翁於銅城作五詩送之
向來刀筆充書佐歲晚衣巾學道流畢竟賢於人一著
醉中夢裏忽回頭

拂袖歸來久閉關道人剝啄訪平安要知對面劉居士

卷九
即是翻身靖長官

去去尋師莫遠尋蓬萊何處海深深山房幸有栖身地
且讀西山夜氣箴

聞說周仙有後身出山不為兩朱輪白雲丹竈俱無恙
憑汝殷勤謝主人

或盤碧漢唳清宵幾載山中伴寂寥今日鶴來翁已出
他年却恐費翁招

和南塘食荔嘆

君欲和詩無匆匆唱首天下文章公今年荔子况倍熟
亭亭錦蓋張高空猿偷鴉啄牧童采林間殘顆猶殷紅
在昔唐家充歲貢吟諷何止杜陵翁南窮交州西蜀土
快馬馱送如飛龍絳裳冰肌初照眼玉環一笑恩光濃
惟閩以遠幸免浣一顆不到溫泉宮自從陳紫無真本
皴玉晚出猶稱雄邇來雞舌擅瑰瑋贊香譽味萬喙同
麟臺仙人親題品天為此果開遭逢乃知微物似有數
聲價亦與時污隆列聖儉德被華戎微如淮白不敢供

奈何置驛奉私室安得木鐸觀民風山蹊谷塹日力窮
血肩踠足馳筠籠請公移此食荔嘆置在薰風殿閣中

後村集卷九